

TSY FENO NY MPIFIDY

Fifidianana tsy ara-dalàna ny fifidianana Loholona hoy ny RMDM

Nahitsy ny RMDM (Rodoben'nyMpano-hitra ho an'ny Demokrasia eto Madagasikara), nandritry ny fihonana notanterahin'izy ireo ny faran'ny herinandro lasa teo, fa tsy manaja lalàna io fifidianana tadiavin'ny fitondram-panjakana ho tatehina amin'ny 11 desambra ho avy izao io, ka tokony hatsahatra mihitsy. Fangatahan'izy ireo ny fandravana ny mpikambana eo anivon'ny Ceni aloha, satria avy taminy avokoa ny fifidianana feno hosoka sy hala-bato teto Madagasikara, tao anatin'izay fifidianana nifandimby teto izay. Hentitra ny pasitera Edouard Tsarahame, fa fifidianana terena miharo ankolaka pôlitika io, ka tokony hajanona avy hatrany. Mbola nanamafy izany koa ny solombavambahoaka voafidy tao atsimondrano, Alain Ratsimbazafy, fa tokony ny fifidianana ben'ny tanàna tamin'ireo



Ny filoha lefitry ny RMDM any Toliara, Pasitera Edouard Tsarahame.

kaominina tsy mbola manana izany aloha no tokony hatao vao miroso amin'izany fifidianana loholona izany. Very zo mantsy hoy izy ny malagasy mpifidy vaventy tokony hifidy raha izao no ataon'ny fanjakana. Na ny teo anivon'ny Ceni tamin'ny alàlan'ny mpitondra teniny, Fano Rakotondrazaka aza dia nilaza fa tsy voahaja ny lalàna amin'io fifidianana loholona io satria tokony ny fifidianana ben'ny tanàna amin'ireo kaominina tsy mbola manana aloha no hatao vao miroso amin'ny fifidianana loholona. Tsy mbola fantatra mantsy hatreto ny daty hanatanterahana izany fifidianana ben'ny tanàna izany. Hatreto anefa dia tsy mihemotra amin'ny teniny ny fitondram-panjakana, fa ho tanterahina amin'ny 11 desambra ihany ny fifidianana loholona na dia tsy manara -dalàna aza.

Rajo

Fanomanana fifidianana

CENI : « Commission Electorale Nuisible et Inutile » no misy

Nanomboka tamin'ny Repoblika fahatelo no nanomboka nisy ny Vao-mierampirenena misahana ny fifidianana, CENI no anarany teo aloha dia niova ho CNE, taorian'ny fanonganampanjakana tamin'ny taona 2009 dia lasa CENIT no anaran'ilay rafitra, dia ankehitriny lasa CENI, ka ny litera I dia avy amin'ny hoe « independent » kanefa dia ny mifanalan'ny amin'izany no niseho. Ingahy Hery Rakotomanana filohan'ny Ceni amin'izao fotoana izany, ka ny nampiasaina ny rafitra io dia izy no nikarakara ny fifidianana feno gaborarakara indrindra dia ny fit-sapankevi-bahoaka nandanian'ny lalampanorenana ny Repoblika fahafatra tamin'ny 17 Novambra 2010, kara-pokontany dia efa nahafahana nifidy tamin'izany, ary vao sambany koa nampiasaina ny biletà tokana tamin'izany, ny tena nampihomemy dia nahemotra ora roa be izao ny fikatonan'ny birao fandatsaham-bato, satria vitsy ireo tonga nifidy tamin'ny ora ara-dalàna, dia mazava fa afaka nanamboatra araka ny fitenin'ny tanora ireo mpikirakira fifidianana, ny vokany dia lany ilay lalampanorenana ary mbola io no mitondra antsika hatramin'izao io. Tsy mbola nampiharina avy hatrany ilay lalampanorenana satria mbola nisy ilay tondrozotra nosoniavina ny 17 Septambra 2011, nananganana ny fitondrana tetezamita niaraha-nitantana nanomana ny fifidianana filohampirenena sy solombavambahoaka, ilay Ceni najoro tamin'ny 2010 dia nosoloina ny CENIT, ka ny T fanampiny dia midika hoe tetezamita, io Ceni io no nikarakara fifidianana dia niaraha-nahita fa feno hosoka ihany koa ny vokat-pifidianana. Rehefa voafidy ny filoha sy ireo solombavambahoaka dia noravana ny Ceni, ka ny Ceni amin'izao fotoana izao indray no nijoro ary niverina tamin'ny toerana indray Ingahy Hery Rakotomanana, ny fomba fiasa dia mbola nitohy hatrany ny gaborarakara, vao mainka nahazo vahana ny lisi-pifidianana feno hosoka, izay mbola nampiasaina tamin'ny fifidianana filohampirenena tamin'ny 2018 sy ny solombavam-

bahoaka sy ben'ny tanàna tamin'ny taona 2019, ny voka-pifidianana dia efa iarahamahalala fa nandresy ny hosoka. Nanomboka tamin'ny fitondrana tetezamita ka hatramin'izao dia nanjaka tanteraka ny hosoka tamin'ny fifidianana, izay no nahatonga ny fanamarihana hoe « nuisible » ny fanalavana ny N sy I, tena ara-bakiteny ireo, ny dikany dia « manimba » sy tsy misy ilana azy ». Ankehitriny hisy indray ny fifidianana loholona, izay nankatoavin'ny Ceni ny fanatontosana izany satria voahosihosy ny lalàna, tsy resaka hosoka amin'ny lisi-pifidianana no misy izao, fa ny mpifidy mihitsy no tsy mbola feno kanefa dia terena tsy maintsy hatao ny fifidianana, ary ny tena mampihomemy dia ilay isan'ny loholona nahena ho 18 kanefa ny faritra 22 ho lasa 23, ny loholona anefa dia mpiahy ny vondrombahoakam-paritra, fa ny tena mahatsikaiky, ny Antenimierandoholona dia hisy filoha iray, filoha lefitra enina, iray isam-paritany, mpampaka teny roa, kestora roa, ny fitambaran'ireo manome 11,

ka birao maharitra avokoa ireo, izany hoe ny birao maharitra izany no maro an'isa noho ny mpikambana senateran'i Madagasikara tsotra, izay miisa 7. Matoa afaka mampihatra ny maha « nuisible » azy ny Ceni dia misy ny « Hcc » izay aretina mitovy ihany no mitaiza azy ireo, dia ny fahatahorana ny mpandoa-bary, kanefa anie dia manampahaizana be diplaoma avokoa ireo mpikambana ao amin'izy roa tonta ireo. Tsy manan-tsafidy aloha izao ireo vahoaka tompo-ny vary loarana, na dia misakafa tapa-kibo sy mandry fotsy aza, f'ireo mpandoa-bary kosa voky an-tenda sy mandrezatra isan'andro ny alahelombahoaka, fa ny zava-drehetra manam-petra, tsy manary toky ireo vahoaka sahy sy mijoro amin'ny fahamarinana fa tsy maintsy hiverina amin'ny heviny tena izy ny fanalavana ny « Ceni », ka hanjaka eto amin'ny firenena ny tena maha vao-mierampirenena sy mahaleo tena azy. Aza matahotra, minoa fotsiny ihany !

Ny Valosoa

Raharaha ecran plat

Mahatsiaro ho afa-baraka Ambatolampy

Tsy azo ampanginina ny lasa ary tsy azo hafanina ihany koa ny zavatra niseho sy efa nisy fa hatoraky ny tantara eny ihany izany. Nalaza sy heno tamin'ny tambazotra ny zava-nisy vokatry ny taratsy nanambara fividianana ecran plat maro tamin'ny vidiny mihao-pampana, nahatsiaro nanongo tena ny faritra niavian'ny minisitra izay tsy aiza fa ny distrikan'Ambatolampy, faritra Vakinankaratra. Raha tsiahivina dia avy ao avokoa mantsy, na ny mpividy, na ny mpivarotra izany hoe na ramatoa vadin'ny Ministra na ny Ministra. Niparitaka tamin'ny tambazotra ny fahafaham-baraka ny tany niavina, nipetraka indray ilay lohateny iray tamin'ny horonan-tsary Malagasy izay hoe: 104 na (cent quatre), samy nangina sy nifampimonomonona tsy sahy naneho hevitra moa ny vahoaka tany an-toerana, satria araka ny zava-misy dia na ny ben'ny Tanàna an'Ambatolampy voafidy tamin'ny alalan'ny IRK aza dia fianakavian'ny Ministra akaiky ihany koa, noho izany dia mahatsiaro miboridana eo anatrehan'ny zava-misy ihany ny vahoaka tia mandalina any amin'ny

faritra. Na izany na tsy izany aza, miaina araka ny fitan-drivo-politika ny vahoaka avy any amin'ny faritra iny. Tsetsatsetsa tsy aritra no ilazana fa nangina tsy nisy niteny intsony ireo antoko politika hafa, taorian'ny fifidianana Ben'ny Tanàna tamin'ny taon-dasa iny, izay nitazonan'ny antoko TIM laharana voalohany hatramin'izay. Mipetraka ny fanontaniana hoe resy ve izany, ka nangina, sa miandry ny tsy zakan'ny aina vao hitraotra. Mbola hendry ny vahoaka, ka mamitsaka anaty fitoniana, olon'ny fo tokoa isika Malagasy, ka betsaka ireo miandry azy handraotra vao mirongatra, fiteny nalaza tamin'ny taona 2002 ihany koa ny hoe "tsy maintsy mipoaka ny sarombilany", tsara ny manamarika fa mpanao vilany malaza Ambatolampy, ka asa mety ho tanteraka ve izany fitenenana izany... dia rahoviana? Am-po tsy milaoka hono mandavaka ivoho, ka atsipany teny ho an'ny manan-tsaina, aza andrasana ho maina re ny tany vao tondrahana, aza manao didin'ny be sandry fa hihintsana ihany ho lazoin'ny taona.

Nofy Andrianjaka

Ny Valosoa sy fakafaka

Tsy fanajana ny demokrasia Voakasiky ny hafatr'i Antonio Guterres i Madagasikara

Firenena demôkratika marina ve i Madagasikara amin'izao fitondrana Rajoelina izao ? Iaraha-mahita sy miaina ny zava-misy eto amin'ny firenena tato anatin'izay herintaona sy valo volana mahery izay. Tsy misy afaka hilaza fa malalaka ny fanehoana ny hevitra sy fahafahana miteny. Ny vokany, raha vao olona niana-kendry sy nahasahy niteny nitsikera ny tsy zava-tsy mety eto amin'ny firenena, indrindra ao anatin'izao hamehana ara-pahasalamana izao, dia tsy maintsy misy enjika amin'ny endriny samihafa mahazo azy, ary mety hiafara amin'ny fahapotehan'ny fiainany izany. Raha tsorina, ny fijerin'ny mpandinika sy mpanara-baovao maro eto amin'ny firenena, dia tsy mahazaka demôkrasia ity fitondrana ity. Mahadika zavatra maro izany.

Voakasika be dia be amin'ny lazain'ny sekretera jeneralin'ny Firenena Mikambana (ONU), Antonio Guterres, ny zava-misy eto Madagasikara, raha araka ireo hafany amin'ity andro androany 15 septambra, andro iraisam-pirenena ho an'ny demôkrasia ity. Anisan'ny navoitran'ny ahiahiny amin'ny tsy fanajana ny zon'olombelona sy ny fanjakana tan-dalàna ao anatin'izao krizy ara-pahasalamana maneran-tany izao. Noresahiny ny amin'ny fahalalahan'ny fanehoan-kevitra sy miteny, ary ny asa fanaovan-gazety; ny fisamborana ny fihazonana am-ponja ireo mpanao gazety sy ny mpifanandrina politika, ny mpiasan'ny fahasalamana; ny fihetsiky ny polisy na mpitandro filaminana mahery setra sy ny asa fitsikolavana ny tambazotra izay miha-mitombo hatrany; ny momba ny fandrinarirana ny fifidianana, izay miteraka toe-draharaha miha- mafana sy korontana. Saika hita taratra eto amin'ny firenena avokoa ireo ahiahiny ireo na dia misy firenen-kafa mety hitovy tranga amin'izany. Eto amintsika anefa toa mikasa handeha lavitra amin'izany. Ankehitriny, ohatra, nopotehina sy noezahina nofafana ny kianjan'ny demôkrasia eny Ambohitato; tsy misy mahazo midina an-dalambe haneho hevitra, fa avy hatrany dia ny Emmoreg mirongo fitaovam-piadiana no miandry azy vao maraina; izay mbola mahasahisahy manao izany sy mitabataba dia ny fonja no miandry azy; ny mpanao gazety mila mitandritandrina raha hamoaka hevitra sy hilaza ny marina, fa fisamborana sy fonja ihany koa no miandry azy amin'ny alalan'ny fanodinkodinana ny lalàna hifanaraka amin'izay tian'ny mpitondra hanamelohana azy. Vokany, sahirana ny olom-pirenena mamoaka ny heviny momba ny firenena. Tsy maintsy mitandritandrina mafy izay maneho hevitra amin'ny haino vaky jery ato anatin'izao fitondrana izao. Tany tsy demôkratika izany, tsy voahaja ny demokrasia eto amintsika.

Ataon'ny fitondrana ho fitaovana politika ny fampiasana ny hamehana ara-pahasalamana, hoy ny maro. Ny famonjana olona samihafa ihany koa tato anatin'ny famon-bolana izao, dia midika zavatra maro mifanohitra amin'ny demôkrasia. Hahalasa saina ihany ny mbola hahenoina fa mpitondra demôkraty no misy ary tany demôkratika i Madagasikara amin'izao fotoana izao. Rehefa misy singa fototra iray na roa amin'ny demôkrasia voahosihosy fotsiny mantsy, dia efa miàla amin'ny zotran'ny demôkrasia izany. Hita taratra anefa izany eto Madagasikara amin'izao fotoana izao.

Sôh'son

PRIERE AU SACRÉ CŒUR



Que le Sacré Cœur de Jésus soit loué, adoré et glorifié à travers le monde pour des siècles et des siècles, Amen.

Dites cette prière 6 fois/ jour pendant 9 jours et vos prières seront exaucées même si cela semble impossible. N'oubliez pas de remercier le Sacré Cœur avec promesse de publication quand la faveur sera obtenue.

Remerciements au Sacré Cœur pour faveurs obtenues.

Mika R.